

Basef Ifimba Pol Nanda'ef Fagafe'ma Esis Efesusi

Basef bandafi Pol nanda'ef fagafe'ma Efesusi

1:1-2 Basef fagali'i ma dagala Poli na'i God nogatopalopa esis
1:3-3:21 Okom Godi atom anen fowa' dambadamba nosaho'apa
mogape epes ananipai ea' nakolasa epes hiasi Juda saloma esis
sogolalama Godi sogape mini'ap atifip
4:1-6:9 Waf bu'wafi apa' epes Godi magafe' mogogala'ii monda'afi
6:10-20 Apa' magahapifanai mofa' hiahaom manda' wandafi mopa'
mogali'amona waf awafi
6:21-24 Basef akutaifi

1 ¹Ae' Pol okom Godi atona nandandepe ataga aposel Jisas Kraisi ma
anda' maol ananini agawalapa basef ananifi. Ae' anda' basef ifimba
fagafe'mago ipa' epes Godi dei' pagape Efesusi, ipa' pahapifa Kraisi Jisas
datima pape sisihipa pagalomana. ^a ²Ae' a'i God ahamapa ape'inai noloma
Dembina'i ape'inai Jisas Kraisi motopalopepa dowaf mowa' banagaipa
pepe opalef awanelef. ^b

Apa' magape sisihipama Kraisi, God naso'apa hiahaom hiami fasimi ilifami

³Apa' ata' mondanifela Ahamapa God, ahama Dembinai ape'inai
Jisas Kraisi! Ama Kraisi atona anen naso'apa hiahaom hiami fasimi atom
magape otaga ilifi mogatopalopapa ukupi ambagof ape'isi ma poe fe' ki
ape'ini nogape andeande'. ^c ⁴Dei' main, fowa' God ina dei' nanda' itap
apale, ata' owa'atin, nemaf afamba nosaho'apa ea' mope sisihipama Kraisi
hilili' ma waf awafi kofagefa akapa. ^d ⁵Anen okom maimailapa a'owa'.
Isimba atis anen nali' okom mandanda' nosaho'apa nofa'apa nalagapa
mataga si'i awasi ananipai. Anen naila okom ananiami atom nanda'asa

^a 1:1 Ro 1:1,7; 2 Ko 1:1-2; Kl 1:1-2; Ap 18:19-21; Ap 19:1 ^b 1:2 Ef 2:6 ^c 1:3 Jo 15:16,
17:24; 2 Te 2:13; Ef 5:27; Kl 1:22 ^d 1:4 Jo 1:12

lagol Jisas Kraisi atogol.^e ⁶ God nanda'as na'amba ma apa' mosa'ma agol ananigili moganifelona ma waf fasifi ananifi nagatopalopapa dowafafi. Waf afamba fawalapa banagami mogogala'i ananiami. Anen natopalopapa dowaf naso'apa nogamana okom ananiami magamagailana a'owa'i, ea' mape sisihipama anen.^f

⁷ Krais atona naga' natagwahepa ma waf awafi natalepa esimbel ananimbeli. Ea' nakwaha waf awafi ape'ifi okom maso'anaf. Anen nanda'as na'amba si'i okom Godi magaila ape'i si'im a'owa' ma waf nagatopalopapa dowafafi. ⁸ Waf afamba naso'apaf si'if a'owa'. Naso'apaf faloma gawa hiani naloma gawa mogogawa waf maif bu'wafi a'a awafi.^g ⁹⁻¹⁰ Okom ananiami atom na'i notopalopapa ea' nihimba'mapa basef ananifi fali' fandambaho' fagape okom ananiami atumi. Basef ifimba fagape na'amba. Anen nali' okom mandanda'ma Krais nogape dembinai ma hiahaom hiami magape ilif itapi hi'igalam epes wapani. Nogota atamba anen atona okom maga'iatai totagata, God noso'ana hiahaom amamba mofe' lagol Kraisi atogol ma anen atona nogape dembinai ma hiahaom amamba hi'igalam.^h

¹¹ God nanda' hiahaom amamba hi'alam nagi'ma fowa' dambadamba anen okom mandanda'mam. Ea' nosaho'apa mape sisihipama Krais. Dei' main, anen nandaila okom ananiami si'i fowa' dambadamba okom mandanda'mas. ¹² Apa' Juda atepa mogawa endilisi mape mogohafa Kraisi, God nandandepapa na'amba ma monda' epes hiasi sogasa'ma agol ananigili lu'wagol. Agol agalemba ananigili fasigili a'owa'.ⁱ

¹³ Ea' dei' ipa' wapani, afamba pegame' basef endilisifi ifimba basef bu'wafi Godi, nofa'epa petanimai pahapifa Krais pape sisihipama anen. Nogota atamba ipa' pahapifa Krais, God naso'epa Ambal bu'unai ananinai nosahe'epa. Ambal bu'unai anamba si'i anin ametal God nanda'mepani ma nigihimba'mepa na'amba.^j ¹⁴ Apa' mogawa endilisi atapipa mopoma anaf nogaso'apa hiahaom bu'wami apa' epes ananipai. Anen noso'apam nemaf afamba notagwahepa nofa'apa mofe' mope mogalomana. God nanda'am na'amba ma apa' monda' epes hiasi sogasa'ma agol ananigili lu'wagol, agol agalemba fasigili a'owa'.^k

Pol nandabetena Goda nogaso'asa gawa esis Efesus

¹⁵⁻¹⁶ Basef doko'ifi endilisifi atif. Isimba atis dei' dondol anda'mepa beten ipa'. Nemaf afamba fagali'i ame' basefa waf ipe'ifi pahapifa Dembinai Jisasa ukup pelele' pagaila amam nematawa hiasi Godi. Ae' anda'as nemaf afamba afi'i afi'i ataga dei', ae' ina akwahipa ma beten, owa'atin. Ae' okom

e 1:5 Mt 3:17; Kl 1:13 **f** 1:6 Ef 2:7; Kl 1:14,20 **g** 1:8 Ro 16:25; Ga 4:4; Kl 1:16,20

h 1:9-10 Ro 8:28-29 **i** 1:12 Kl 1:4-6; Ef 4:30 **j** 1:13 2 Ko 1:22 **k** 1:14 Kl 1:4; Kl 1:3; 1 Te 1:2

mandanda'mepa andabeten anifela Godepa.^l ¹⁷Jisas Kraisi anen dembinai ape'inai. Ae' andabeten atapiwi nimaguf hiafi ahali' God, dembinai Jisas Kraisi, anen Ahamapa ape'inai mogogala'i banagami magapaunai. Andabeten ahali'ana ma nogase'epa gawa bu'wani ukup ipe'ipi pegegawa basef kofagefa fendawalap alihifa ipa'. Ama pegegawa God andeande'.^m ¹⁸Ae' andabeten ahali'ana ma nonda' ukup ipe'ipi pindawisi'ma pegegawa waf bu'wafi, ma hiahaom bu'wami anen nofalepa pape pegehafami. Ma pegegawa ambal namili lagape lifilafi dondoli loloma anamba God nagala'ambemagoma nogogala' a'owa'ma. Amamba God nandondomba ma anaf na'i noso'apa mogaloma epes ananisi si'isi.ⁿ ¹⁹Andabeten ahali'ana ma ipa' pegegawa banagami ananiami dondol manda' maola opalef nomon apa' epes magahapifanai. Amamba ea' lu'um a'owa'. Banagami amamba na'amba atin si'i banagami ananiami lu'wami^o ²⁰nanda'ama nasa'ma Jisas nosafel nagakwaha ga' ananini. Banagami amamba atom God nanda'ana nape wa'ol lagol ananigili kwahisigili banagogoma gani heven. ²¹Apa' Kraisi dei' nape dembinai ilif a'owa' ma dembami agufumi hiami maloma hiahaom banagami hiami. Anen nikila' agof lu'wagufi hi'alagof epes dei' sagape nogota ata'ii, ea' isimba sogape nogota tigi' totagagai wapani.^p ²²God nanda' hiahaom hiami mape lafela anen atona. Ea' nanda'ana nape Dambena ilif endilisi ma epes hiasi hi'alas saloma hiahaom hiami hi'alama nagatopalopa esis sios hiasi sagahapifanai hi'alas.^q ²³Esis sagahapifanai si'i alop si'ip Kraisi. Anen nape anamba hiagoma nugumafi hiahaom hiami hi'agalami nape nomona esis sagahapifanai hiasi si'isa anen atona endilisi.

God nanda'apa magaga'i mape namepa

2 ¹Basef ipe'ifi fagape na'amba. Fowa' ipa' panda' waf naninani aunai, nahepa paga'. Dei' main, ipa' ina pame' God, owa'. Pesambalona panda' waf awafi.^r ²Nogota atamba ipa' ata' paila waf awafi atef itapafi ea' paila basefa aman aunai banagonai nugumafi banagami awami mape la'afen mugumafi itapi otagai. Banagami amamba mataga aman anamba aunai dei' nugumafi epes isimba sogosambala Godi.^s ³Fowa' apa' hiapai hi'alapa manda' waf awafi si'i epes isimba sogosambala Godi sanda'afi, ea' maila nomonas opaf apifi ape'ifi atof. Apa' maila nomonas nembel anamba apinai ma ukup ape'imi atom. Isimba atis dei' ata' mape lafela okom wandafunai Godi, si'i anis epes daias itapasi.^t

⁴Owa', God naga'i owahipigama apa' epes a'owa'i, okom lu'wami mailapa. ⁵Isimba atis dei' nanda'apa mataga namepa. Apa' mape si'i

^l 1:15-16 Kl 1:9 ^m 1:17 Ef 4:4; Kl 1:12 ⁿ 1:18 Kl 1:11 ^o 1:19 2 Ko 13:4; Kl 2:12; Hi 1:3; Kl 1:16, 2:10 ^p 1:21 Sam 8:6; Mt 28:18 ^q 1:22 Ef 4:10,15; Ro 12:5; Kl 1:18 ^r 2:1 Kl 3:7; Ta 3:3; Jo 12:31; Ef 5:6, 6:12; Kl 1:21, 2:13 ^s 2:2 Kl 3:6 ^t 2:3 Lu 15:24,32; Ro 6:13; Ef 2:1; Ap 15:11

sagaga'i ma waf awafi. Owa' nanda'apa mataga namepa mape sisihipama Krai. Amamba okom lu'unai Godi nagatopalopapa dowafi nofa'epa pitanimai.^u ⁶ God nasa'mapa mape namepa maloma Jisas Krai, mofa' agol lu'wagili mape sisihipama anen, ea' ukup pandanda' papomana heven.^v ⁷ God nanda'apa na'amba ma nogota ata'e dei' tefe' tefe' totaga owagama nihimba'mas okom ananiami mailapa nagatopalopapa dowafi, ma epes hiasi hi'ilas soloma ensel hiami hi'ilam sogogawa okom amamba ananiami lu'um a'owa' mandawalap alihima apa' na'amba. Anen nanda'apa mape sisihipama Krai Jisas.^w ⁸ Dei' main, God natopalopepa dowaf, isimba atis dei' nofa'epa pitanimai pahapifa Krai. Hiahaom amamba ina ipa' atipa panda'am, owa'atin. God atona nase'epam dowaf.^x ⁹ Amamba ina si'i hiahaom ipa' panda' maol pegefa'ami, owa'. Ea' ina anin epen atitin la'ifina negasa'ma agol ananigili atogola hiahaom amamba, owa'atin.^y ¹⁰ Dei' main, God atona nanda'apa mape. Lagol Krai Jisasi atogol nanda'apa mataga dambaipa ma waf fasifi apa' milaf mogafe'.^z

Krai nakolasa mini'ap biafip pataga atifip

¹¹ Ea' apa' mondogawa isimba andeande'. Lagof amom Judai atogof matopa' alop amamipi. Ea' esis Juda sandafela esis atis sa'i epes sagatopa' alopi. Ea' ipa' fowa' pape pegelelama Godi owa' Judaipaia, sofalepa saga'i, "Owa' pegatopa' alopia." Basef ifimba fa'i waf alopafi ando' atogini.^a ¹² Ipa' pendegawa nogota atamba ata' pape pelelama God, ipa' ata' pape ando' laogona Krai, pape ando'ma esis mini'ap Israel epes Godi, ea' pape ando'ma basef God anen nala' lapef nagaloma asisafi. Basef ifimba naga'i endilisi atisa nogatopalopasafi. Ipa' ina anom hiahaom fasimi pape pegehafam anafi, owa'atin. Ea' ipa' owa' pihapifa Goda.^b ¹³ Apa' ipa' fowa' pagape laogona Godi, esimbel Kraisi atembal ma ga' ananini befa'epa dei' bakolasepa pafi'i pape felefele'ma Goda lagol Jisasi atogol.^c

¹⁴ Dei' main, anen atona kofagonama opaf awanafi, nagakolasa apa' Juda maloma ipa' anep mini'ap fowa' pegelelama Godi, dei' mataga mape epes atifipa. Anen atona nahape' waf afamba fagawala apa' Juda maloma ipa' owa' Judaipaia. Ea' anen atona natopa' waf afamba boufi lopa' fitapafi.^d ¹⁵ Ga' Kraisi atin nali'amona basefa mu'uli fowa' God nagaso' Mosesani faloma anif basef du'wanif fagape mu'uli inimbai. Anen nanda'as na'amba nokolasa misi'ah ahamba biafih, apa' Juda maloma ipa' owa' Judaipaia mogataga si'i epen atitin dambaini. Ama mope opalef

^u 2:5 Kl 2:12 ^v 2:6 Ef 1:7 ^w 2:7 Jo 4:10; Hi 6:4 ^x 2:8 1 Ko 1:29-31; 2 Ti 1:9 ^y 2:9 Ta 2:14 ^z 2:10 Ef 5:8 ^a 2:11 Kl 1:21; Ro 9:4; 1 Te 4:13 ^b 2:12 Kl 1:20 ^c 2:13 Ais 9:6; 1 Ko 12:13; Kl 2:14 ^d 2:14 2 Ko 5:17; Kl 1:20,22

awanalef fegape atogon felefele'ma God.^e ¹⁶Krais naga' lawag usi'igai ti'wanaegai nakolasa misi'ah ahamba biah hataga si'i alop atotop. Ea' ga' ananini natagwaha waf asasifi boufi lopa' fitapafi faga' hi'alaf.^f ¹⁷Anen dei' nafi'i na'i basef bu'wafi nawalapef na'i, "Dei' ipa' pape opaf atof paloma Godi epes wapani. Anen na'ipipa basef ifimba fowa' pape laogona God pelelamana, paloma apa' Juda ananipai magape felefele'ma anini wapani.^g ¹⁸Lagol Kraisi atogol apa' mini'ap biafip mape ufiaw alihi'wa mogafe'ma Ahamapa Goda Ambal bu'unai ananinai atona.^h

Apa' Kristen hiapai hi'alapa si'i ipat Godi

¹⁹Ea' ipa' dei' ina ata' pape si'i laugunisi dalaisi itap akasi, owa'atin. Ipa' paloma esis amam nematawa mini'ap Godi, ea' wambota ananipai.ⁱ ²⁰Ipa' pape si'i ipat Godi nape nagala'ata atapitai. Anen nanda'ata tatoma ilifa afa' aposel waloma amom profet nawafa si'i olalefa ipat atamba. Apa' Krais Jisas anen atona si'i olaf fagali'i banagafi endilisi ma ipat atamba.^j ²¹Aolagaitama tatoma sisihita ma Krais, ea' banagota andeande' tape. Dei' God ata' nanda' ipat atamba nala'ata atin totaga lu'uta ma togape hilili'ma Dembinai atona.^k ²²Ipa' wapani pagape sisihipama Kraisi, dei' God nape nakolasepa atogon atapina paloma anis Kristen alipisi hiasi. Ea' nanda'epa pataga si'i ipat endilisi God nagapautai ma Ambal bu'unai ananinai atona.

Pol nanda' maol nawalipa epes hiasi anep mini'ap owa' Judaisia sogololama Godi

3 ¹Krais nakolasa mini'ap biafip Juda saloma esis owa' Judaisia sataga mini'ap atifip. Isimba atis dei' ae' Pol, Krais Jisas nanda'e anda' kalabusa egatopalopa ipa' epes fowa' pegelelama Godi.^l ²Endilisi atis, apa' hiapai magape itapi natopalopapa dowaf. Amamba anen nase'e ma igimafiam enda' maol ewalapama egawalipipa.^m ³Maol inimba anen nagasi'iani nagape na'amba. Basef ananifi bu'wafi fowa' ata' fandambaho', apa' dei' God nawalapamef alihif anda'ef bandef fail pas isi'i. ⁴Ama i'i pigatalifa basef ifi'ima, atiasi pegawa okom ae'ami ma basef hiafi Kraisi fali' fape fandambahi'i. ⁵Fowa' lifilafi God ina nawalapef alihifa anis epes, owa'. Apa' dei' Ambal bu'unai ananinai nawalapef alihifa afa' aposel waloma amom profet ananifai.ⁿ ⁶Basef ifimba bu'wafi Godi fagape na'amba. Esis hiasi owa' Judaisia hi'alas fowa' sogololama Godi saloma ipa' apataga atifipa paloma apa' Israel. Ea' ipa' hipai hi'alepa paloma apa' Juda mofa'

^e 2:15 Sek 9:10 ^f 2:16 Ais 57:19 ^g 2:17 Ef 3:12 ^h 2:18 Ef 3:6; Hi 12:22-23 ⁱ 2:19 Mt 16:18; 1 Ko 3:11 ^j 2:20 Ef 4:15-16; Kl 2:19; 1 Ko 3:16 ^k 2:21 1 Pi 2:5 ^l 3:1 Kl 1:25; Ef 4:1; Fl 1:7,13; Fm 1,9 ^m 3:2 Ef 1:9-10; Kl 1:26 ⁿ 3:5 Ef 2:13,16-19

hiahom fasimi hiami God naga'i endilisi atis nogaso'apami ma lagol Krai Jisasi.^o

⁷God nanda'e ape anda' maol agawalapa basef ifimba bu'wafi. Anen okom maimaili natopalope dowaf nowa' banagae, isimba atis dei' ape anda' maol inimba.^p ⁸Endilisi atis ae' ape falafuwai agagi' endilisi ma amam nematawa hiasi Godi hi'alas. Owa' anen okom maimaili natopalope dowafa anda' maol awalipa esis sogololama Godi basef fasifi ma Krai. Basef ifimba faloma waf afamba bo'wes a'owa' sikila' gawa epes hiasi hi'alan, ea' ina la'ifisa sogogawa isimba kofagesa, owa'.^q ⁹Ea' God natopalopas dowaf nihimba'masa okom ananini maloma waf hiafi ananifi epes hiasi hi'alas. Okom amamba maloma waf afamba ananifi hiafi fowa' dambadamba sape sandambaho' safi'i sataga dei'. Apa' dei' nanda' hiahawes hiasi hi'alas sataga sagapani nase'e maol inimba agawalapa isimba sape sandambahi'i alihis.^r ¹⁰Fowa' God ata' nambaho'was, apa' dei' na'i esis Kristen sios sagahapifanai sihimba'mamas amom dembami agufumi maloma hiahom banagami hiami magape heveni mogawa gawa Godi. Gawa inimba hiani ananini naninani lu'win sa'win hi'alan. ¹¹Anen nanda'an na'amba atin si'i okom ananini atom magape atapim dondoli maga'iana lagol dembinai ape'inai Krai Jisasi atogol.^s ¹²Apa' mape sisihipama anen mahapifana. Isimba atis apa' ina ombal mahapa ma mogafe'ma God, owa'. Apa' ukup banagep endilisi ea' dei' mafe' felefele'ma anen.^t ¹³Ea' dei' a'ipipa a'i, akafimi amamba dei' efa'ama egatopalapepa ami, na'amba piti amamba ukup iwanip pendahagas, owa'i. Pepe banagepa si'i ipa' dembipai. Dei' main, akafimi amamba ame'ama egatopalopepa.

**Pol nandabetena esis Efesus ata' sogogawa andeande'
waf Krai okom magamagailasafi**

¹⁴Ae' nomonas sandanda'ma Krai nakolas apa' Juda maloma ipa' magataga atifipa, isimba atis dei' indywa nembawa etawa andabeten anifela Ahame. ¹⁵Apa' hiapai hi'alapa magape itapi maloma sagape ilifi wapani, apa' amam nematawa wambotagw hiagwi hi'alagw mofa' agof ape'igufi ma anen atona.^u ¹⁶Ae' andabeten ahali'ana na'amba. A'i God notopalopepa ma banagami mogogala'i ananini lu'wami a'owa'. A'i banagami ananini atom mowa' banagaepa opalef ipe'ilifi nomona Ambal bu'unai ananinai atona.^v ¹⁷A'i hapif ipe'ini atin Krai nope ipe'ilifi nomon atapina. Ea' andabeten ahali' Goda waf ukup pagapagailasafi fegape si'ifa ipa' ma fegewa' banagaepa pilutu banagepa pigaila waf afamba

o 3:6 Kl 1:23,25 **p** 3:7 1 Ko 15:9-10; Ga 1:16; Ef 1:7 **q** 3:8 Ro 16:25 **r** 3:9 Ro 11:33; 1 Pi 1:12 **s** 3:11 Jo 14:6; Ro 5:2; Hi 4:16 **t** 3:12 Kl 1:24 **u** 3:15 Kl 1:11 **v** 3:16 Jo 14:23; Kl 1:23, 2:7

si'i nombalef lawag gahapila itap gogotawa banagoga.^w ¹⁸ Ai' ipa' pefa' banagami peloma amam nematawa Godi hiasi pegegawa okom Kraisi naganagailipai, anamba lu'unai endilisi nafe' laona a'owa' nafe' wa'ol wa'ol nalota gani ilif a'owa' ea' nowala nafe' awin endilisi a'owa' nafe' atin.^x ¹⁹ Ea' andabeten ahali' God ambifa basef akutaifi na'amba. Ai' ipa' pegawa okom anamba Kraisi endilisi, anamba nikila' gawa epes hiasi hi'alas. Ai' ipa' pegawa okom anamba Kraisi ma pegape si'ipa a'owa' ma waf bu'wafi God okom maga'iefi hiafi hi'igalaf.^y ²⁰ God anen banagonai. Banagami amamba ananiami dei' manda' maol opalef ape'ilifi nomoni, amamba banagem endilisi. Banagami amamba atom anen la'ifinai ma nonda' hiahaom hiami migikila' basef hiafi mandabeten magahali'anafi hi'alef faloma ukup apa' hiapai hi'alapa wapani. ²¹ Isimba atis dei' apa' Kristen sios magahapifanai munifela God mondasa'ma agol ananigili lu'wagola Kraisi Jisas lililafi mofe' atin anaf owagama gani. Endilisi.

Apa' Kristen si'i alop si'ip Kraisi

4 ¹ Basef ifi'i fagali'i endilisifi atif. Ea' dei' a'i efela ukup ipe'ipi dindinipa poe fe' ipe'ini negafe' dondo'ma waf usi'ifi okom Godi maga'iefi nofalapa ma mogailafi. Ae' anda' kalabusa maol inimba atin Dembinai dei' a'ipipa na'amba afela nomonas ipe'isi.^z ² Ipa' pendape lafel endilisi ma epes hiasi penda'as sa'ombemas. Esi sonda'mepa waf awafii, pindanindifa ukup ipe'ipi banagep pepe pititilis. Ipa' ina ukup pesafel awep, owa'i. Ukup pindapindaila sahin owan ipe'isi petopalopas pefa' nimaniami pelomas.^a ³ Ambal bu'unai Godi nakolasepa mape opalef atelef. Ea' dei' penda' maol banagambela pigahapila waf afambai sisihifa waf ukup awanipafi atef. Waf afamba opalef atifilifafi fandawalap fagape na'amba.^b ⁴ Alop atifip, Ambal bu'unai Godi atifina. Amamba na'amba atin si'i hiahawes atifis, God nali' nofalepa pape pegehafasi.^c ⁵ Dembinai atotona, hapif atifin, sa'of atifin.^d ⁶ God ahamapa apa' hiapai anen atotona nape dembinai ma apa' magahapifanai hiapai hi'alapa. Anen nagape anamba hiagoma hi'agalagini, ea' nape nomona apa' hiapai hi'alapa.^e ⁷ Apa' hiapai atona atin hi'alapa mofa' anom hiahaom fasimi ea', dondo'ma ikwaf Kraisi nawalogaf nagaso'apaf ea'i.^f ⁸ Si'i Buk Baibel naga'i na'amba na'i,

“Nemaf afamba anen nagafe' gani ilif, nofa' epes hiasi sanda' kalabusi a' nafe' nalota ilif. Ea' naso'asa hiahaom fasimi esis.”^g

⁹ Basef faga'i, “Nagalota ilif,” kofagefa fa'i main? Ifimba fa'i anen nagali' nafi'i nowala gani awin endilisi a'owa' itap apa'e. ¹⁰ Ea' aman anamba

^w 3:17 Kl 2:2 ^x 3:18 Kl 2:10 ^y 3:19 Kl 1:29 ^z 4:1 Kl 3:12-13; Ef 3:1; Kl 1:10 ^a 4:2 Kl 3:14-15 ^b 4:3 Ro 12:5; Ef 2:16,18 ^c 4:4 Jo 10:16 ^d 4:5 1 Ko 12:6 ^e 4:6 Ro 12:3,6 ^f 4:7 Sam 68:18; Kl 2:15 ^g 4:8 Jo 3:13

atona nogowala itap awin endilisii dei' notambel nalota ilif wapani nafe' gani ilif a'owa' nikila' otaga ma nonda' hiahaom hiami hi'igalam si'im kwaifa anen atona.^h ¹¹Anen atona ea' naso'apa presen hiahaom fasimi na'amba. Anom amam nandandepama monda' maol aposel, a' anom nandandepama monda' maol profet. Ea' anom nandandepama monda' maola mofe' moga'ipasa basef bu'wafi Kraisi epes hiasi. Ea' anom naso'ama gawa mogape pastai tisa mugumafi esis Kristen mowalipasa basef bu'wafi figasindi'amonas andeande'.ⁱ ¹²Krais naso'apa hiahaom amamba fasimi ma monda' apa' amam nematawa Godi mondandombola mogape la'ifipama monda' maol bu'wani ananini. Apa' amam nematawa Godi si'i alop Kraisi, ma mondowa' banagama atin mogape.^j ¹³Ea' mope mefe' mefe' ma anaf apa' hiapai magahapifanai mogataga opalef atelef endilisi ma hapif ape'ini noloma gawa atifina anen Nogamana Godi. Apa' magataga epes banagepa endilisi magahapifanai si'i epes dambes ea'i, motaga na'amba atin si'i ikwafa waf bu'wafi Kraisi atef.^k

¹⁴I'i apa' mogataga na'amba, apa' ina ata' mope mondati si'i awasi gawa akasi wapani, owa'. I'i epes isimba sogogawa a'owa'i sanda' kikipai ma waf baso'aifii si'ipapa basef hiafi fafifafi, amambai ina monda' ukup ape'ipi bol atin pepe si'i naoh gwagakoto'ma kanu. Amamba ina mogoto'mapa monda'apa si'i fufin nufapusapa mafe' magafi'i, owa'atin.^l ¹⁵Apa' ukup banagep, ea' mi'i basef endilisifi atifa waf ukup pigapigailasafi. Apa' mi'i basef endilisifi na'amba ma mila waf Kraisi bu'wafi hi'igalaf. Ea' motaga banagepa migikila' waf mali' magailafi. Apa' monda'as na'amba mefe' motaga dondo'ma ikwafa waf Kraisi, anen balagonama apa'. ¹⁶Anen atona dembinai ma apa' Kristen hiapai. Ea' apa' Kristen hiapai si'i alop wa'awa'ap pagape atifip sisihipa pondatopalopa atin si'i gigisilimb begewa' banaga so'matagw hiagwi lu'ugw sa'ogw hi'agalagw. I'i alop wa'awa'ap hiapi hi'ilap ponda' maol pondahama ikwaf anen naga'iefi, alop apamba si'ip pandatopalopa atin pape banagep pikila' fowa' pagape. Alop apamba pataga banagep atina ukup pandaima atin.^m

Apa' Kristen mondofa' waf dambaifi

¹⁷Dei' a'i i'lipipa anif basef. Ipa' pape sisihipama Dembinai dei' a'lipipa dindinipa agol ananigili. Ipa' ina ata' pila waf afamba sogololama Godi sagailafi, owa'i. Hapai. Epes isimba ukup asasipi pandapoma waf falafifi atef.ⁿ ¹⁸Gawa ma ukup asasipi si'i akot atona. Esis sololama gawa fasini, sanda' du'waniga, opalef asasimi maso'as. Isimba atis dei' sape ando' laogona ambal namili Godi.^o ¹⁹Esis ina ata' ambagof awagofa waf afamba awafi asasifi, a' owa'atin. Safe' sawis endilisi ma waf awafi fafifafi hiafi

h 4:10 1 Ko 12:28 **i** 4:11 2 Ti 3:17 **j** 4:12 Kl 1:28 **k** 4:13 1 Ko 14:20 **l** 4:14 Ef 1:22, 5:23; Kl 1:18 **m** 4:16 1 Pi 1:14; Ro 1:21 **n** 4:17 Ef 2:12 **o** 4:18 Kl 3:5

faloma waf awafi so'a waulafi ma sagaila waf alugufi hiafi hi'agalaf. Saila waf afambai atapisa ukup pegehafel endilisi ma sonda' waf afamba awafi wapani.

²⁰ Apa' ipa' ina pelafa waf afambai ma Krais, owa'atin endilisi. ²¹ Ae' egawa endilisi ipa' pegawa basef Kraisi ea'. Ipa' pagape sisihipama anini, amom mawalipipa ea' ma basef ifimba endilisifi Jisas nigihimba'mapafi.^p ²² Fowa' ipa' pelafa basef ifimba na'amba. Dei' li'amonago opaf anamba apinai ma waf awafi ipe'ifi. Opaf anamba kofagonama waf baso'afi kowagalasafii, ea' waf afambai dei' fape fahambombagapa. Dei' ea' li'amonago opaf anamba apinai.^q ²³ Ea' ukup ipe'ipi petaga dambaip pendaho'of^r ²⁴ pefa' opaf dambaifi. God nanda' opaf anamba dambainai, nataga si'i anen atona ma waf bu'wafi endilisifi usi'if hilili' a'owa'i.^s

²⁵ Ea' ipa' hipai hi'ilipa pendakwaha waf baso'afi ma piga'i basef endilisifi atifa epes hiasi. Dei' main, ipa' pegawa apa' hiapai hi'alapa mape alop wa'awa'ap ea' mataga alop atifip.^t ²⁶ I'i opalef ipe'ilifi numbutilif fepe atapilif, ipa' a' solawaipa andeande'. Na'amba ipa' penda' waf awafi opalef numbutilif atapilif pefe' awin a' newala neso'. Na'ambai owa'i. ²⁷ Na'amba piwisi' utama Satan.^u ²⁸ Epes mamahisa sanda' wal atini, esis ina ata' sonda' wal wapani, owa'i. Esis dei' sondanda' maola lagof asasigufi ma atiasi sotagama hiahawesa sogaso'asas epes isimba hiahawes akasi.^v ²⁹ Basef awafi ina fetaga malogof ipe'igufi, owa'i. Basef bu'wafi atif fendataga ma fegewa' banaga epes isimba owa' banagesia, dindi'i dondo'ma waf maif bu'wafi esis owa' banagesa sogailafia. Penda'as na'amba ma pegatopalopa epes isimba sogame' basef ipe'ifii.^w ³⁰ Ipa' ina penda' anef waf awafi ma penda' Ambal bu'unai Godi nimanina, owa'i. Anen anol ametal Godi ma God nandandepapa ea' ma pagape ananipai atipa si'ipa ma anef nemaf notagwahipa ma waf awafi nofa'epa pitanimai pegape andeande'.^x ³¹ Ipa' pendakwaha waf hiafi awafi opalef awalifi migimigah, ukup numbutipi gigala basef findiwaifi awafi. Waf anamba aunai hianai nagahambombaga epesi.^y ³² Ipa' pendanda' waf sa'umbilifi ma esis alipisi pendatopalopas ea' piti uwahipis. Ipa' pendakwahomasa waf awafi esis sanda'mepafi ukup pese'epaf, si'i God nagakwahomepa waf awafi ipe'ifi ma agol Kraisi.

Apa' mefe' mundaila waf bu'wafi ma mogogala'i

5 ¹ Ea' ipa' pindaila waf God nanda'afi. Anen okom maimailipa pape si'i awasi ananisi.^z ² Ipa' pendafe' waf afamba ukup

P 4:21 Ro 8:13; Kl 3:9 **Q** 4:22 Ro 12:2 **R** 4:23 Jen 1:26; Kl 3:10 **S** 4:24 Kl 3:8-9; Sek 8:16 **T** 4:25 Sam 4:4; Je 1:19-20 **U** 4:27 1 Te 4:11 **V** 4:28 Ef 5:4; Kl 3:8, 4:6 **W** 4:29 Ais 63:10; 1 Te 5:19; Ef 1:13-14 **X** 4:30 Kl 3:8 **Y** 4:31 Mt 6:14; Mt 18:22-35; Kl 3:12-13 **Z** 5:1 Ro 14:15; Ga 2:20; Hi 10:10; Eks 29:18; Mt 5:48

pagapagailasafi si'i Krai okom magaila apa', ma nalamona ambal ananili nagatopalopapa. Anen naso'ana alop ananipi God naga' nondolalimana si'i ofa bu'wani alogw fasigwi usihigwi gwaga'ani.^a

³Apa' waf afamba hiahaof so'a waulafi, a waf alugufi kowagalasafi awafi, ipa' ina penda'af, owa'i. Basefa waf afamba ina fetaga kwasakwasala la'afena ipa', owa'i. Dei' main, ina' andeande'ma apa' amam nematawa Godi monda' waf afambai, owa'i.^b ⁴Ipa' ina penda' basef awafi alugufi a basef putuputa'ifi a penda' basef asalufi awafi, owa'i. Waf afambai ina andeande', owa'atin. Andeande'ma ipa' piganifela God.^c ⁵Ipa' pegawa ea' ma epes mamahisa sanda' waf awafi so'a waulafii, a epes mamahisa ukup awamiisii kowagalama hiahaom anis daiasii, a epes isimba kowagalasa hiahawes daiasii si'i sagaila god baso'amunai. Epes isimbai ina atiasi sifi'i suwis anamba God naloma Krai magala'ambemagoma, owa'atin.^d ⁶Ipa' solawaipa andeande'. Na'amba peme' basef anis epesi atif solalamona ukup ipe'ipi pefe'ma waf afambai awafi. Dei' main, waf afamba na'ambaifi, God okom numbutinama epes isimba sanda'afi sogosambala basef ananifii. ⁷Isimba atis dei' ina penda' waf afamba penda'oma pelomas, owa'. Hapaifi.^e

⁸Dei' main, fowa' ipa' ata' pagape waf awafi si'i owamb. Apa' dei' pape sisihipama Dembinai, isimba atis dei' nahaponepa papoma mogogala'i. Ipa' pendafe' si'i epes sogape alip haugumai. ⁹Epes sagafe' alip haugumaii sawalapai waf fasifi usi'ifi, endilisifi hiafi hi'alaf.^f ¹⁰Ea' ipa' pendondomaf pegawa waf maif Dembinai okom maga'iefi.^g ¹¹Ipa' ina peloma epes isimba sanda' waf awafi si'i owambi pendao'oma atogon atin, owa'i. Waf afambai wafifi atef, ina fegela gwa'aisi bu'wasi, owa'atin. Ipa' pindihimba'ma epes isimba hiasi waf afambai awafi. ¹²Dei' main, ae' ina ewalapa basefa waf anamba aunai epes isimba sandambaho' sanda'ami, owa'. Ae' ambal aola iga'iaf atin dowaf wapani.^h ¹³Apa' waf mamahefa nagwahis ileliwa mogala' magawalapafi, kofagefa fataga fape fandawalap.ⁱ ¹⁴Dei' main, hiahaom mamahoma mataga alihim mandawalapi, amamba mataga mape si'i mogogala'i. Isimba atis dei' anif basef fapan faga'i na'amba fa'i,

“Ipa' epes paga'ihii dei' safel dasa'ma mehipekwaha koh! Ipa' pesafel wande'ef ea' Krai nese'epa mogogala'i mihihima ipa'.”^j

¹⁵Ipa' pape mogogala'i ea'. Ea' ipa' pindundumafuma andeande'ma fe' ipe'ini. Ipa' ina pefe' si'i epes isimba gawa akasi, owa'i. Ipa' pendafe' si'i epes isimba gawaisi. ¹⁶Dei' ipa' nogota ata' tapomepa ma penda' waf Godi. Ea' pendanda'af atapif lifilafi nogota ata'e. Dei' main, nimaguf

a 5:2 Kl 3:5 **b** 5:3 Ef 4:29 **c** 5:4 1 Ko 6:9-10; Kl 3:5 **d** 5:5 Kl 2:4,8; Ro 1:18 **e** 5:7 Ef 2:11,13; Kl 1:13; 1 Pi 2:9; Jo 12:36 **f** 5:9 Ro 12:2 **g** 5:10 2 Ko 10:11 **h** 5:12 Jo 3:20-21
i 5:13 Ais 26:19, 60:1; Ro 13:11 **j** 5:14 Kl 4:5

ifi'i sanda' waf awafi atifafi.^k ¹⁷Ea' ipa' dei' ina pepe si'i epes gawa akasi ukup pese'epa, owa'i. Pendegawa andeande'ma okom Dembinaii.^l ¹⁸Ea' ipa' ina pea' embel banagimbeli pehaga pegaol, owa'i. Waf afambai fegahambombaga ipe'i. Ipa' pinda'i aho'ma Ambal bu'unai Godi nondape si'inama opalef ipe'ililifi.^m ¹⁹Ea' pinda'i basef bu'wafi pinda'imef atin pendaloma esis alipisi ma penda' awalef bu'walefi fagape buk sami feloma awalef lotuwilifi feloma awalef fegewa' banaga ambagofa ukup epesi. Ipa' penda' awalef pesa'ma agol Dembinai banagambel malogufi ukup ipe'isi.ⁿ ²⁰Dondol pendanifela ahamapa Goda hiahaom hiami ma agol Dembinai ape'inai Jisas Kraisi atogol.^o

Basef epes isimba sandaso'amai

²¹Ipa' pindaila okom Kraisi ea' pendafe' lafela esis alipisi ipe'isi atapipa.^p

²²Ipa' nematawa pindaila ukupa basef amom wauhupipai si'i pagaila okom Dembinaii.^q ²³Dei' main, aman anen nape balaga nagali'ma ako'wi, si'i Kraisi nagape balaga nagali'ma sios amam nematawa Godi. Ea' esis hiasi si'i alop si'ip ananipi. Epes isimba anen atona nofa'as sotanimai. ²⁴Epes isimba sios safe' lafela Kraisi, ea' na'amba atin ipa' nematawa wapani, dondol pendape lafela amom wauhupipa ipe'imi.^r

²⁵Ipa' amam wapani, ukup pindapindaila wauhiamepa ipe'iwai, si'i Kraisi okom magamagaila sios amam nematawa Godi, naga' nalamona ambal ananili nagaho'ofas.^s ²⁶Anen nanda'as na'amba sogataga epes Godi atis be'es hilili' si'i nasa'opas embel sagataga bo'wesa basef ananifi.^t ²⁷Ama nonda'as sogataga bo'wes endilisi sogape ananisi si'isa alogw hiahaom awami akas. Ea' sope hilili' andeande', hiahaom awami hiahaom akas. ²⁸Dei' na'amba atina ipa' amam ukup pindapindaila awo wauhiamepa si'i ukup pagaila alop ipe'ipi atop. Aman ami okom magaila waulu'mana anani'wii, anen okom maila anen wapani. Dei' main, esis sataga atifis. ²⁹Apa' hiapai mogawa ina anona aman atotona nandaiwa'ma alop si'ip ananipi nahap nalamonap, owa'atin. Amam amamba hiami manda' gwa'aisi malagap mumafiap andeande', si'i Kraisi nugumafi sios amam nematawa Godi.^u ³⁰Dei' main, apa' epes wa'awa'apa alop ananipi.^v ³¹⁻³²Basef ifi'i fowa' fape fandambahi'i, lu'wafi nomonas hiesifi. Dei' fataga alihif si'i Buk Baibel na'ias naga'i, "Aman nokwaha mamasana ananisi nefe' nope atapina nogaloma waulu'mana anani'wi, esis bias sataga alop atifip."

k 5:16 Ro 12:2; Kl 1:9 **l** 5:17 Lu 21:34 **m** 5:18 Kl 3:16; Sam 33:2-3 **n** 5:19 Kl 3:17
o 5:20 1 Pi 5:5 **p** 5:21 Kl 3:18; 1 Pi 3:1 **q** 5:22 1 Ko 11:3; Ef 1:22 **r** 5:24 Kl 3:19; 1 Pi 3:7; Ga 1:4 **s** 5:25 Ta 3:5; Hi 10:10 **t** 5:26 2 Ko 11:2; Kl 1:22 **u** 5:29 1 Ko 6:15, Ef 1:22
v 5:30 Mt 19:5; Re 19:7

Ae' okom mandanda' ma'i basef ifimba faga'i Kraisi atona naloma sios amam nematawa Godi. ³³Apa' basef ifimba kofagefa fa'ias na'amba wapani ma ipa' epes atona atin na'amba fa'i, "Ipa' amam hipai hi'ilepa ukup pindapindaila wauhiamepa ipe'iwai si'i ukup pagapagaila ipa' atipa."

Ea' ipa' nematawa hipai wapani pendasa'ma agofa wauhupipa ipe'imi pinifelom pindaila basef amamifi.

Basef esis mamasasi faloma batawisasi

6 ¹Ipa' awasi, ipa' pindaila basef mamasepa ipe'isii si'i pagaila basef Dembinaii. Waf afambai usi'if andeande'.^w ²Dei' main, anif basefa mu'uli nape nagali'i Godi basef endilisifi atif fagapaini faga'ias na'amba fa'i, "Ipa' pindaila nomonas mamasepa ipe'isi ea' pesa'ma agofas." ³Basef ifimba faga'i na'amba ma esis sagaila nomonas mamasasi, "Ma ipa' pegape andeande' nogota laota itap apa'e."^x

⁴Ea' ipa' ahapas ina pehambombaga ukup awasi ipe'isi iwanip owa'i. Ipa' pindumafias andeande' piwalipasa basef Dembinaii penandonamasef pisindi'amonas.^y

Basefa esis agufisi saloma anis agof akasi sanda' maol dowafi

⁵Ipa' agof akipai panda' maol dowaf pagape lafela agufisii, ipa' peme' basefas pefe' lafelas ombal mehepamas. Ipa' penda' maol inimba pila basef asasifi andeande'ma ukup atifip si'i pagaila basef Kraisi. ⁶Ipa' ina penda'asa naep asasipi dowadowafa pegambema ukup asasipi atip, owa'atin. Pendanda' maol inimba si'i panda' maol pagape lafela Kraisi. Penda'as na'amba atin si'i pagaila okom Godi ma nelelemb ipe'ilimbi. ⁷Ipa' ukup pehafel endilisi pendanda' maol inimba andeande'. Ina panda' maola epes atis, owa'. Ipa' panda' maola Dembinai atona.^z ⁸Dei' main, ipa' pegawa, i'i epen ami nenda' maol andeande', anaf Dembinai notalin noso'an hiahawes bu'wasi. Ea' nonda'as na'amba atina isimba agof akasi sanda' maol dowafi soloma isimba sanda' maol sogofa' otambai.^a

⁹Ipa' agufipai pigimafi isimba agof akasi sanda'mepa maol dowafi, ipa' penda'as na'amba atina esis si'i panda'asa Dembinai atona. Ipa' pendkwahowa waf afamba sagaumbalisafi. Dei' main, ipa' pegawa Dembinai nagape heveni anen Dembinai ipe'inai, asasinai wapani. Anen ina nagawaloga agofa epesi ma naep ananipi, owa'atin. Anen nawaloga hiasi agufisi agof akasi hi'alasa ikwaf usi'ifi atef.^b

Kristen amam nematawa si'i soldia

¹⁰Dei' a'i isopama basef na'amba. Ipa' pagape sisihpama Dambinaii, pendape banagepama anen atona ma banagami lagola pipitagol atogol

W 6:1 Mt 15:4; Kl 3:20 **x** 6:3 Kl 3:21; Diu 6:7,20-25; Sam 78:4; Pro 22:6 **y** 6:4 Kl 3:22-23; Ta 2:9-10; 1 Pi 2:18 **z** 6:7 2 Ko 5:10; Kl 3:24-25 **a** 6:8 Kl 4:1; Ro 2:11 **b** 6:9 1 Ko 16:13

ananigili.^c ¹¹ Ipa' pendala luwaguf hiami manda' wandafami God nagase'epami, ma pilutu banagepama pigali'amona waf awafi baso'afi Satani.^d ¹² Dei' main? Apa' ina manda' wandaf maloma epes, owa'atin. Apa' manda' wandaf mapa' maloma ambagof gambefah awami mape magali'i ea' maloma amom agufumi awami a' amom ensel banagami awami maloma banagami hiami awami hi'alam mugumafi epes sanda' waf awafii itap apa'ii. Apa' mapa' maloma ambagof awami hiami magape la'afena otagai itapi. ¹³ Isimba atis dei' pendawisa luwaguf amamba banagami sanda' wandafami hiami God nagase'epami hi'indalepa. Ama nemaf afamba awefa, ipa' la'ifipama pigalutu banagepa ma pikila' gwamba anamba hianai pegatofana. Ama pikila' waf awafi hi'igalafa pigalutu banagepa atapipa.^e

¹⁴ Ipa' pilutu pendawisa luwaguf amamba na'amba. Ipa' pindhapila basef endilisifi usi'ifi si'i anota let ipa' pegewaho'atai. Ea' penda' waf fasifi usi'if hilili'i fepe alihif si'i sagala siaot banagonai sanda' wandafanai kapa nigili'ama mafatagw ipe'igwi.^f ¹⁵ Ea' penda' anef waf bu'wafi na'amba. Pendandombola pegewalapa basef bu'wafi Godi na'i epes sope ukup atifip sogalomana. Ipa' pefa' waf afamba banagafi pindalutu banagepa si'i esis sala su sagalutu banages. ¹⁶ Ipa' pendanda' waf afamba si'i hiahaom amamba sanda' wandafami ea' piwatani anef waf wapani. Pihapifa Kraisi tatala'ipa si'i pefa' walitap bandagigil panda' wandaf. Walitap anamba banagonai ma nogahagasa wambawa hikalimi hiami hi'igalam magafi'i aman anamba aunai. Wambawa amamba gwamba awani hiani.^g ¹⁷ God nofa'ai ipa' pigatanimai. Amamba ipa' ukup pendanda'mam pefa'am si'i pegowalo' hagw kapaigwi banagagwi balagah ipe'igahi. Ea' pindhapila bainat hikalinau Ambal bu'unai Godi nagasi'ipanai, anamba basef Godi atif.^h ¹⁸ Ea' lililafi pendefa' banagami Ambal bu'unai anambai ma penda' beten naninani hiani pegahali' God. Ipa' solawaipa pendabeten pindumafuma datima. Ina pepoma noma'w, owa'. Pendabeten atapipa ma God notopalopa esis amam nematawa ananisi hiasi hi'igalas.ⁱ

¹⁹ Ea' pendabetena ae' wapani ma nemaf mamahefa iga'ipasa basef God notopalopa malogol ae'agili ma basef egawalipasafi. Ama etalogofa ombal mogahe egawalipasa basef ifimba bu'wafi Godi fowa' fape fandambahi'i.^j ²⁰ Ae' awalapa basef ifimba, dei' isimba atis mowa' lagof ae'agufi sen ape anda' kalabus. Maol ae'ani inimba. Ae' efa' malagol Kraisi ma egawalapa basef ifimba ananifi ma epes hiasi. Ea' pendabetena Goda ae' egatalogofa ombala banagewe igawalipasef si'i okom Kraisi maga'i.^k

c 6:10 Ro 13:12; 2 Ko 10:4; Ef 4:14 **d** 6:11 Jo 14:30; 1 Pi 5:8-9 **e** 6:13 Ais 11:5, 59:17; 1 Te 5:8 **f** 6:14 Ais 40:9; Nea 1:15; Ro 10:15 **g** 6:16 1 Te 5:8; Ais 49:2; Hi 4:12 **h** 6:17 Lu 18:1; Kl 4:2; 1 Te 5:17 **i** 6:18 Ap 4:29; Kl 4:3-4; 2 Te 3:1 **j** 6:19 2 Ko 5:20; Fm 9
k 6:20 Ap 20:4; Kl 4:7-8; 2 Ti 4:12

Anif basef du'wanif akutaifi

²¹Aman anamba Tikikus anen alipunai endilisi ape'inai, apa' ukup paga'ianai. Anen nape sisihinama Dembinai nanda' maol ananini datima. Anen atiasi nofo'o nowalapa basef ni'ipipa ae' dei' ape a'imama. ²²Ae' a'i esapa'ana nefe'mago ipa' ma atiasi pegegawa afa' wagape na'aii wape wa'imama ma nogowa' banagaepa.

²³Ae' a'i God ahamapa naloma Dembinai Jisas Kraiis monda'ago opalef ipa' alipipai hipai fepe atogon peloma God. Ea' a'i amom mese'epago waf afamba ukup pagapagailasafi feloma hapif bu'wani wapani.¹ ²⁴Ea' a'i God notopalopepago dowaf nowa' banaga epes isimba mamahisa ukup pagapagaila Jisas Kraiis Dembinai ape'inai atapis sagapani. Waf epes isimba ukup pagailanafi afamba fagape atapifi, owa' hi'igalafia. Ea' ma'uf.

¹ 6:23 1 Pi 1:8